

## 錢死人無代

這是一 e5 嚴肅的問題。

認為無論發生天大地大的代誌，只要錢開落，所有的大小代誌，攏變無代誌，這就是錢死人無代。

有錢人、好額人囡、酒醉的人、駛砂石仔車的人，若有這種觀念，駛車都較緊、較袂細膩，烏白超速、超車、long3 紅燈，一失覺察 long3 著人，肇事者心內想的：

「極加賠人錢，錢死人無代！橫直阮兜有錢、阮爸有錢、阮頭家有錢、公會有事故賠償的預備金，我無咧驚。」

人命呢！害人受傷、害人殘廢、害人過身，tu1 錢出面，肇事者就老神在在，攏無代誌的款式。毋過，伊毋驚，別人是驚起來囡，規 e5 社會是 tshuah4 咧等。

換一 e5 角度，如果肇事者家己，抑是家己的親人變成受害者，伊敢欲接受了錢消災，錢死人無代？

人毋是物件、毋是工具、毋是閣買閣生著有。咱愛堅信，每一 e5 人攏是獨一無二的，一生攏只有一擺，毋管戇巧好額散的生命，攏愛受著尊重，受著平等的對待，這才是人道，才是天理。